

# NEWSLETTER

*juni 2024.*




**FONDACIJA**  
HASTOR

# Sara Keserović

***Nije čovjek ono što misli, već ono što čini,*** kazao je Meša Selimović, koji nas je podsjetio na suštinu rada i djelovanja kao osnovu svakog ljudskog bića. Kroz volonterske aktivnosti Fondacija Hastor demonstrira važnost praktičnog djelovanja i stremljenja ka ostvarivanju pozitivnih promjena. Misija Fondacije naglašava pomaganje drugima kao temeljni princip koji oblikuje identitet društvenog angažmana. Primarni je cilj rubrike *Stipendista mjeseca* podsticati aktivnost pojedinaca koji odražavaju altruističke ideje Fondacije. Sara Keserović stipendistica je koja svojim predanim radom svima nama predstavlja izvor inspiracije.

Sara dolazi iz Sarajeva i već godinu dana stipendistica je Fondacije Hastor. Studentica je treće godine Fakulteta za edukaciju i humanističke nauke na Odsjeku za grafički dizajn i multimediju na Internacionalnom Burch Univerzitetu. Još iz srednjoškolskih dana privrženja je sedmoj umjetnosti. Njen prvi film nastao je 2018. godine, dok je nedavno kompletirala svoje peto ostvarenje. Svojom ambicijom i entuzijazmom neprekidno djeluje u mnogim aspektima društvenog aktivizma.

Njen interes i sklonost ka umjetničkim sferama podstakli su je da se predano posveti učenju, istraživanju i razvoju vještina. To ju je dovelo do izuzetnog napretka na različitim poljima njenog života. U okviru Fondacije Hastor Sara volontira u timu za grafički dizajn te je uspješno spojila svoju strast prema umjetnosti s volonterskim angažmanom, stvarajući okruženje u kojem umjetnost služi kao osnova za promicanje i podršku zajednici.



*Mnogo mi je drago i iznimno sam zahvalna Fondaciji Hastor što imam priliku volontirati u timu za grafički dizajn i što mi je otvorena mogućnost da se još više razvijam na polju za koje se i školujem. U posljednjih nekoliko mjeseci moj glavni angažman vezan je za dizajn Newslettera, kao i za Godišnji izvještaj, u čemu mnogo uživam. Od svih zadataka najdraže mi je raditi na dizajnu Newslettera jer, dok ga kreiram, volim i pročitati sve o čemu se taj mjesec piše. Savjetujem i drugim stipendistima, kao i onima koji to planiraju biti ili samo prate rad Fondacije, da čitaju Newsletter i sve njegove interesantne rubrike.*

Tokom ove godine Sara je imala priliku naći se među dvadeset najaktivnijih volontera koji su izabrani i proglašeni na obilježavanju 18-e godišnjice Fodacije Hastor. Ovaj je uspjeh doživjela kao veliku čast ističući to kao jedno od svojih najznačajnijih postignuća:



*Fondacija Hastor pružila mi je priliku da pokažem i unaprijedim sve svoje vještine te mi je dokazala da postoje organizacije u Bosni i Hercegovini u kojima se zaista cijeni volonterski rad mladih ljudi i koje pružaju konstantnu podršku u ostvarivanju naših ciljeva, što nam svima neopisivo mnogo znači. Zaista riječima ne mogu opisati zahvalnost koju osjećam zbog toga.*

Članak pripremila: Semina Sadiković

# Mustafa Puljarga



Jon Bon Jovi jednom je izrekao kako je **teorija bez prakse kao kotač bez osovine, a praksa bez teorije kao slijepac na putu**. Primijeniti naučeno, makar to bilo i u malim količinama, veliko je umijeće. To mogu samo rijetki, stoga je *Rubrika aktivnih mladih* i posvećena upravo rijetkima – onima koji znaju implementirati naučeno i koji se na poseban način ističu u određenoj sferi. Jedan od takvih studenata dio je porodice Fondacije Hastor. Njegovo je ime Mustafa Puljarga koji dolazi iz Gornjeg Vakufa, malog grada na izvoru Vrbasa. Prva je godina Mašinskog fakulteta u Mostaru i član je Fondacije Hastor osam godina, tokom kojih je naučio mnogo toga, a ono što je najvažnije – shvatio je kako su obrazovanje, saosjećanje i nesebičnost ključ uspjeha.



Njegov se altruizam nazirao još u srednjoškolskim danima, kada je bio član Asocijacije srednjoškolaca, gdje se zalagao za prava učenika. Doprinos zajednici tu se nije zaustavio, pa je na većem akademskom stepenu postao dio Naučno-nastavnog vijeća Mašinskog fakulteta u Mostaru u kojem zagovara bolji studentski status. Mustafa je svoju empatiju proširio i na Mrežu mladih Gornjeg Vakufa – grada gdje je stjecao prva znanja i vještine. Aktivan je član Unije studenata Univerziteta u Mostaru, gdje učestvuje u organiziranju studentske lige zahvaljujući dobrim organizacijskim vještinama koje je stekao u Fondaciji Hastor.

Fondacija je prepoznala Mustafine pozitivne osobine te mu pružila šansu da bude mentor mlađim stipendistima, a Mustafa ističe kako se na njihovim sastancima može uočiti timski rad – svi zajedno uče, rade i pronalaze rješenja. Na tim sastancima naučio je da se jedino zajedničkim snagama može doći do izvrsnih rezultata pa je na Mašinskom fakultetu sa svojim kolegama dobio priliku za odlazak na takmičenje "Design Megdan", u organizaciji INTERA Tehnološkog parka. Njihov je zadatak bio da kroz timski rad izrade maketu vozila. Taj je projekt iziskivao mnogo truda, rada, znanja i odgovornosti, ali Mustafa je zajedno sa svojim timom osvojio izuzetno drugo mjesto, što ga je dovelo do dvomjesečnog boravka na praksi u preduzeću "Alfa Therm". Tvrdi da je Fondacija velikim dijelom zaslužna za svaki njegov uspjeh.

*Obaveze koje imam u Fondaciji Hastor naučile su me odgovornosti. Shvatio sam da kao pojedinac mogu pomoći, uraditi nešto korisno i naučiti usput mnogo novih i važnih stvari. Stoga, želim zahvaliti Fondaciji koja kao bedem stoji iza nas i pomaže nam u izgradnji naše ličnosti, ali i boljeg i uspješnijeg društva.*



Svoj angažman u takmičenju vidi kao odskočnu dasku za dalji napredak. Vjeruje da mali koraci nisu beznačajni jer mogu dovesti do nečeg velikog, a na istom je principu zasnovan i angažman u Fondaciji Hastor. Zanimljiva činjenica u vezi s Mustafom jeste ta da mu je u svemu navedenom motivacija ljubav prema domovini. Želja mu je biti izvrsnim ambasadorom naše zemlje, zahvaljujući čijim će uspjesima mnogi čuti za Bosnu i Hercegovinu. Vjeruje da studiranje onog što volimo, ma šta to bilo, može dovesti do izvrsnih rezultata, a Bosni i Hercegovini trebaju upravo takvi ljudi – izvrsni i predani.

*Bez obzira na rezultat, ono što je bitno jeste to da sam kroz cijelo takmičenje radio ono što volim, a, u suštini, to jesu neke inovacije – područje u kojem se zaista osjećam sretno i zadovoljno jer vjerujem da znanje koje steknem radeći ove male projekte poslije mogu iskoristiti u izradi većih projekata koji će biti prepoznati i u Bosni i Hercegovinu i van nje, a kroz koje će i naša domovina biti predstavljena na najbolji mogući način.*

U svemu što radi, pored Fondacije, podrška su mu njegova porodica i prijatelji koji mu pomažu kako u idejama tako i u realizaciji svega što pokuša napraviti. Na kraju, važno je naglasiti da su njegovu ljubav prema okolini, mašinstvu i domovini uvidjeli i profesori, pa i oni predstavljaju njegov veliki oslonac. Fondacija Hastor ponosna je na to što su ovakvi ljudi njeni stipendisti i uzori mlađim generacijama.

**Članak pripremila: Aldina Šaljić**

# Amir Sarajlić

U ovomjesečnoj rubrici Alumnista mjeseca predstavljamo priču našeg bivšeg stipendiste Amira Sarajlića iz Gračanice. Amir je još kao stipendista bio istinski zaljubljenik u životinje i veliki ljubitelj prirode, a takav je ostao sve do danas i svoju ljubav iskazuje kroz veterinarski poziv. Rođen je u Gračanici, gdje je završio osnovnu i srednju školu, a potom je upisao Veterinarski fakultet u Sarajevu. Za vrijeme svog studija Amir je marljivo volontirao s osnovnoškolcima iz Gračanice te ističe kako su mu uspomene na te volonterske sastanke ostale duboko urezane u sjećanje.

***Najposebniji dojam tokom volontiranja na mene ostavilo je zadovoljstvo i osmijeh učenika s kojima sam radio – to je isto ono zadovoljstvo koje je ostavljala i Fondacija Hastor na mene.***

Amir danas na Fondaciju Hastor gleda isto kao i onda kada je postao stipendista ove velike porodice. Fondaciju vidi kao svog odanog prijatelja koji mu je pružio ruku u najizazovnijim životnim razdobljima. Uvijek se rado prisjeća svojih početaka i rado prepričava svoja iskustva iz volonterskog perioda.

Veterinarski fakultet bio je logičan odabir zbog ljubavi prema životinjama koje su obilježile njegovo djetinjstvo tokom boravka na selu. Amir, također, ističe i važnost stručne prakse tokom fakulteta koju je pohađao kod kolega koji su već duže vremena imali veterinarsku stanicu s bogatim radnim iskustvom. Vrijednost volontiranja tokom studentskih dana pokazuje nam i sama Fondacija kroz priliku za različite vidove istog u njenim okvirima. Veliki broj naših bivših stipendista svoj prvi radni angažman dobilo je na osnovu titule stipendiste ove porodice koja se trudi da u nama probudi i osvijesti talente za kakve nismo ni svjesni da posjedujemo.

Volonterske obaveze nije bilo teško uklopiti jer je Amir uvijek znao organizirati svoje vrijeme i postaviti prioritete tako da nijedna strana ne trpi. Danas, kada pogleda nekoliko godina unazad, ovaj hrabri stipendista uočava mnoge benefite koje je stekao tokom volontiranja. Bolja organizacija, fleksibilnost i empatija samo su neki od faktora koji su ga učinili uspješnom ličnošću, a većinu njih stekao je u Fondaciji.



Amirova poruka za stipendiste Fondacije Hastor:

***Volite životinje jer tada volite i ljude, budite humani i prema životinjama i prema ljudima, pomozite im ukoliko ste u mogućnosti.***

**Članak pripremila: Adelisa Begić**

# Uzeir Tihak

Kada kročite u čarobni svijet volonterizma, učit ćete da će vas nešto iznova i iznova vraćati u njega. Neka želja će vas voditi ka tome da nižete nova prijateljstva, nove uspomene i mnogo novih aktivnosti. Međutim, kada to volontiranje spojimo s onim što istinski volimo, tada se ono pretvara u naš pravi maleni i posebni svijet. Ovog mjeseca donosimo vam priču o volonteru koji mijenja svoj , ali svijet oko sebe, Uzeir Tihak.



Uzeir dolazi iz Gornjeg Vakufa, malog mjesta s velikim srcem. Student je treće godine na Farmaceutsko-zdravstvenom fakultetu Univerziteta u Travniku. Pored svojih akademskih obaveza Uzeir je aktivni član Omladinskog centra Bugojno, gdje u okviru volontiranja u lokalnoj zajednici s mnogo entuzijazma učestvuje u raznim aktivnostima i projektima. Poznat je po svojoj neiscrpoj pozitivnoj energiji, upornosti i samopouzdanju.

Naš ovomjesečni sagovornik pravi primjer je da volontiranje nije samo rad bez naknade – to je čin ljubavi i saosjećanja prema zajednici. Uzeir aktivno radi na implementaciji raznih projekata sa svrhom unapređenja stanja u lokalnoj zajednici te svojim volonterskim angažmanom kao stipendista Fondacije Hastor postaje uzoran primjer mladim generacijama.

Jedan od značajnih projekata u kojima je učestvovao jeste "Viječko" – edukativna igra koju organizira Vijeće mladih BiH. Igra na zabavan način učesnike obrazuje o zakonima o mladima. Cilj joj je osnovati Vijeće općine, zatim kantona i, na kraju, same Federacije.

Uzeir je, također, bio učesnik projekta "Računarska budućnost". Projekt je imao za cilj opremanje kabineta informatike u područnoj školi "Vesela" (Bugojno). Ovaj projekt omogućio je učenicima pristup digitalnom obrazovanju čime su dobili priliku da razvijaju svoje vještine korištenja računarske opreme.



Nadalje, Uzeir je učestvovao u projektu "Renoviranje basket igrališta" u Lamelama (Bugojno). Sa svojim timom odlučio je ofarbati linije na terenu, postaviti novi koš i mrežu, dodati spužvu oko konstrukcije koša za zaštitu igrača te da urediti i ofarbati tribine.

Iako ide na fakultet i pored toga vrlo posvećeno volontira, Uzeir uspijeva naći i slobodno vrijeme u kojem se bavi rekreativnim sportskim aktivnostima. Ova ljubav prema sportu inspirirala ga je da se prijavi na projekt "Bugojanska gradska utrka 2024".

Pored porodice i prijatelja, Fondacija Hastor igra ključnu ulogu u njegovom životu:

*Kada je riječ o Fondaciji Hastor, dovoljno je reći da sam stipendista još od osnovne škole i da ju s ponosom predstavljam svima, ističe Uzeir.*

Kroz volontiranje u Fondaciji razvija se kao osoba i unapređuje svoje vještine, posebno komunikacijske, što je izuzetno bitno u današnjem vremenu. Kada je postao mentor i dobio svoju grupu, shvatio je ozbiljnost svoje uloge:

*Želio sam pomoći svim učenicima da se opuste, da ne žive u strahu, da se oslobode tereta s kojim se suočavaju i da na sastanke dolaze veseli i raspoloženi. Zaista mi je drago što sam imao priliku da budem makar mala vodilja djeci s kojom sam volontirao. Nadam se da sam im makar malo pomogao u oblastima u kojima su imali poteškoća, objašnjava on. Trudio se da s njima ostvari prijateljski odnos, a tek potom da im bude autoritet.*



Ova podrška i iskustvo s Fondacijom Hastor dodatno su motivirali Uzeira da doprinese svojoj zajednici. Volontiranjem u lokalnoj zajednici razvija svoje vještine te kroz brojne projekte svakodnevno radi na razvijanju najprije svog užeg okruženja, a potom i dijele Bosne i Hercegovine jer mali koraci vode do velikih uspjeha.

**Članak pripremila: Hana Hajrić**




## Izaberi svoje teško

Nije lahko pratiti svoje snove  
I prevazi i sve prepreke nove  
Koje se na trnovitom putu  
Neminovno na u

Nije lahko istrajan biti  
I muku iza osmijeha kriti  
Dok te mu e izazovi teški  
Dok se raduju svakoj tvojoj greški

Ali još je teže ne usuditi se  
Ne skupiti snage i volje  
Na putu da se otkrije ljepše i bolje  
Još je teže ne potruditi se  
Ne spoznati svu svoju snagu i mo  
Kroz život nezainteresovan pro /  
Uvijek i i linijom manjeg otpora  
I sam sebi ne biti najve a potpora

Nikolina Stanar



### Kontaktirajte nas!

Bulevar Meše Selimovića 16,  
Sarajevo  
033 774 789  
033 774 823  
fondacija@hastor.ba



### Redakcija

Almina Šabanović-Kokot  
Adelisa Begić  
Semina Sadiković  
Aldina Šaljić  
Hana Kolasević  
Amina Bašić  
Nikolina Stanar  
Hana Hajrić



### Grafički dizajn

Adnan Kevrić



### Naslovnica

Nejla Dedić